



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 6

Congress lenir Navjot Singh jail nungi chiokogo

Amit Shah-i Rs 2,414 crore alang mapatongtem indang lung azungtsü



VOL. XX NO. 170 (ADOK 170)

DIMAPUR

AMUNGNÜ (SUNDAY)

RONGCHII (APRIL) 02, 2023

₹ 5.00

S Supongmeren Jamir NPCC president shim

Dimapur, April 1, 2023 (TYO): Nagaland Pradesh Congress Committee (NPCC) president K Therie-i March 31, 2023 nü mapa nungi anenogo ase pa melen S Supongmeren Jamir NPCC Tir asütsü shimogo.

Tawa state assembly elections nung Congress-i tamakok anguba atema tenüing agia K Therie-i NPCC president menden toktsü.

Congress president Mallikarjun Kharge-i Nagaland Pradesh Congress Committee (NPCC) vice president aser taoba MLA S Supongmeren Jamir-i NPCC president inyaktü shim.

Taoba PCC president K. Therie-i shilem tajung agiba atema Congress-i tenüingsang agütsür ta Congress MP & general secretary KC Venugopal-i sangdong ka nung ashi.

ULB elections ajanga osang magütsütet: K Therie

"ULB elections agütsü osang sangoktsüba agi ni president menden yutsüba osang magütsü, ajisüaka State Election Commissioner-i March 30, 2023 nü cancellation notice agütsüba sülen ni iba osang metetdaktü" ta K Therie-i ashi.

"Congress party indang sabang ajanga ni tesüiba küm 8 jungnüa nübortem tenzüka aruogo. State ajungalen nungi aser talisa Congress züngsemtemi aser temeimertemi ni yariba atema pelar aser talisa media medemertem dang ni kanga pelar kechiyong parnok kü tashi liasü" ta Therie-i sangdong ka nung ashi.

Nübortemi agreed political solutions mapa akümtsü

takhangba aser sorkar ketdangsübaren aser infrastructure tajungba akümtsü onüktem atema vote enoktsütsü ta ni bilem saka kü tangatetba tai liasü ta paisa ashi.

"Lennirtem aser shisashirtemi Congress-i ola adokba onüktem pelashishia agizük saka sensakertemi sen yong vote yokdok. Yimdong nung sorkar anema ola adoka lungkak aitertemi ang parnoki anemba sorkar nem takok ngudaktsütsü asoshi inyakba angudang kanga aoksaogo. Nagaland election ya democratic election ka masü saka iba ya votes auction asüba aser proxy votes amshiba election ka lir. Presiding Officer mesüra Polling Officer kati danga proxy voters noktanga osang ka dang ni mangashi" ta Therie-isa ashi.

"Ni President menden toktsüba dang ashi Congress züngsem ka teinyaktsü metoktsü. Ni maneni tang aser tarutsü pututemi nüjiso atema inyaktü. Sonia Gandhi aser Rahul Gandhi nati kü dak temulung alemba atema pelar aser AICC President Mallikarjun Kharge-i ni yariba atema pelar" ta paisa metetdaktü.

"S. Supongmeren Jamir-i ni melenzükba atema pelar. Pai kü den külemi inyaksema aruogo aser pa ya ajemalu lennir ka lir ta ni meteta lir. Pai Congress aser sorkar ketdangsübaren kanga junga meteta lir. Pai State Assembly nung inyakogo anungji takok aser tamakok kanga junga meteta lir aser ni pa moatsür" ta K. Therie-isa sangdong nung ashi.

NE yimtiba ajak 2025 tashi nung sendakteptsü

Aizawl, April 1, 2023 (Agencies): 2025 tashi nung Northeast state yimtiba ajak sendaktepba mapatongtem renemtsü ta Union Home Minister Amit Shah-i tanü metetdaktü.

Mizoram yimtiba Aizawl nung lokti sentong ka nung

jembidang Amit Shah-i iba osang ashi.

"2025 tashi nung northeast state yimtiba 8 prong rail, road aser air ajanga sendakteptsü aser iba atema Rs 1.76 lakh crore indang mapatongtem inyakdar" ta pai ashi.

Nagaland-i COVID-19 wara 4 buba atema renema lir: H&FW department

Kohima, April 1, 2023 (TYO): Linük nung nisung aika dak COVID putetaka Nagaland Health & Family Welfare Department-i nübortem dang kangabo maoktsü osang metetdaktü.

COVID wara pezübuba ya tesüiba waratem ama masütsü aser Nagaland-ia tayongzükbatem koktetsü atema renema lir ta H&FW department-i ashi.

"Department-i Assam dena Covid kanga putetba tanga state tem den osang agitepdar" ta H&FW Commissioner Secretary Y. Kikheto Sema-i ashi.

"Covid wara pezübuba yabo mezüngbuba aser tanabuba waratem ama masütsü anungji asenoki kanga tsübuabo mebiletmsüla. Covid wara mezüngbuba mapang Nagaland renema maliasü aser tango State health infrastructure den nübo tajungba kümogo" ta pai metetdaktü.

"Onoki tayongzükba kechi ajurudir raratsü renema lir. Nagaland nung Covid wara

pezübuba noktangtsü atema teinyaktsü ajak inyakogo" ta Kikheto Sema-isa ashi.

Covid ya ano metembang aser asenok den mapang talangka alitsü anungji asenoki COVID-19 inyakyim maneni beshitsüla. Department-i five-fold strategy (test, track and treat as well as vaccination & Covid appropriate behaviour) sülen anidaktü ta paisa ashi.

"Nagaland nung ventilator dena ICU 97, ICU bed 107, oxygen supported bed 787 aser normal bed 307 lir. Ano nungdakra yipden teimba akümtsü renema lir. march 31, 2023 tashi nung Nagaland nung nisung 37,988 dak Covid putet aser iba nungi nisung 856 asü aser nisung 1500 tema tanga state temi ao" ta Commissioner Secretary-i metetdaktü.

December 27, 2022 nü COVID preparedness indang tesüsabuba mock drill agi aser iba nung priority health units 85-i shilem agiogo, maneni April 10 aser 11 anogotem taruba mock drill agütsü sentong lir ta pai ashi.

"Mezüng wara ana nung asen nübortem taküm samaba ama mesüdaktsütsü kechiyong infrastructure tajungba kümogo aser nübo peria lir" ta paisa shisem.

"India nung nisung 4000 shi ka dak XBB.1.16 variant of concern (VOC) putetogo aser Nagaland-i Severe Acute Respiratory Illness (SARI) ajak Lab Surveillance & testing asür aser VOC jungjunga tenük yoka repranger" ta State Nodal Officer for Integrated Disease Surveillance Programme (IDSP) Dr Nyanthung Kikon-ia ashi.

"Nagaland nung tang tashi nung mozü kidang amongba, nisung asüba aser oxygen amshiba balaka mali. Maneni onoki positive samples ajak genome sequencing atema inyaker" ta Dr Nyanthung-isa metetdaktü.

Iba osangbener senden nung Principal Director Health Dr. Vibeitunuo Mepfuo aser State Immunization Officer Dr Temsu Longchar naprong aden.

Nagaland Medical College lapoktsü atema NMC nung osang atar

Kohima, April 1, 2023 (TYO): Nagaland nung mezüngbuba medical college indang academic session tenzütsü atema National Medical Council (NMC) nungi temelaba atar ta Commissioner Secretary, Health and Family Welfare Department, Y. Kikheto Sema-i ashi.

Naga nunger ajaki mezüngbuba medical college lapokdaktü nungi ta pai ashi.

NMC teloki tesüiba ita asem tsüingda anaben tashi college mapa inyakba semdangogo aser parnok nungi academic session tenzütsü atema tatembang o

atar, ta Kikheto Sema-isa shisem.

NMC teloki January ita mezüng semdangdang Nagaland state sorkar dang Naga Hospital Authority Kohima (NHAK) nung infrastructure ajunga tajungba akümtsü indang caution letter ka agütsü. Nagaland medical college tenzükdang NHAK ya teaching centre asütsü, ta pai ashi.

Ajisüaka, March 27 nü parnoki tanaben semdangdang NHAK nung aser ano Medical College Phriebagie, Kohima village mapa inyakba atema temulung asüba metetdaktü, ta Kikheto-isa

shisem.

Tan ita tsüingda medical college atema teaching faculty aser tanga staff tem shimba maparen tembangtsü. Department-i contractor tem den June 30, 2023 tashi nung maparen tembangtsü atema tenangzüktep aika agiogo, ta Commissioner Secretary-isa metetdaktü.

"Onoki National Medical Council (NMC) nungi Letter of Permit (LOP) mesüra Letter of Intent (LOI) angütsü atar aser iba ya taruba hopta ana tsüingda angütsü akok" ta paisa ashi.

NSF-i CM Neiphu Rio dang onük 5 nenshia metetdaktü

Kohima, April 1, 2023 (TYO): Naga Students' Federation (NSF)-i Honibarnü Nagaland Chief Minister, Neiphu Rio nem onük pungu takhangba agütsü.

NSF-i Naga Political Issue, e-Governance, Nagaland Staff Selection Board (NSSB), Inner Line Permit (ILP) aser Youth Empowerment onüktem atema shidi ka zülü.

"Naga nunger ajak tsüingda yimjung aser telongjem alitsü atema Chief Minister aser par sorkari mapa inyaktü mepishir. Ano, Naga Political Groups (NPGS) aser Civil Society Organizations (CSOs) ajak sabang ka nung adenshir tekaratiba nung Indo-Naga yimten tebilemstü latettsü ayongzük" ta NSF-i metetdaktü.

Sorkar ketdangsübaren nung tashishitsü malitsü atema e-Governance mapa kümä inyaktü nungdaker. State sorkar department (District Administration) aser agency temi osang tejangja agütsüba ajanga

sorkar ketdangsübaren tashi aittsü ta parnokisa ashi.

Sorkari schemes & programs aser beneficiaries, incumbency list, post creations & vacancies, Department indang osangtem guidelines for departmental websites (GIGW) nung lateta aliba ama yimjak nung sayutsüla, ta NSF-isa metetdaktü.

Nagaland state sorkari Nagaland State Staff Selection Board (NSSB) asangsang nung atalokja preliminary & second phase tatidangtem agiba atema tenüingsang agütsü. Ajisüaka NSF-i Chief Secretary, Nagaland ajanga Chief Minister dang telemsa ajak nung viva-voce component ya total marks nungi 12.5% masü saka 5% tashi ajemtsü ashiba nenshir ta NSF-isa ashi.

NSF-isa state sorkar dang Reservation Policy meyipa reprangshitsü aser iba asoshi telemtetba ka agütsü nenshia metetdaktü.

Nagaland nung Bengal Eastern Frontier Regulation of 1873

kübok Inner Line Permit (ILP) maparen takok ngua meinyaker. Tang teinyakdak online ILP system timi meinyaker anungji ozüing alema arurtem azioktsü atema inyakyim takang ka alitsü nungdaker, ta NSF-i Chief Minister dang ashi.

Nagaland nung ILP inyakyim ketdangsüa reprangtsü atema state level committee/commission ka tentettsüla, ta parnokisa metetdaktü.

Kaketshirtem aser lanurtemi CM Rio-i aniba state sorkar tasen dak nungi Youth Empowerment atema teimla tulu lir, ta NSF-i ashi.

Nagaland nung zünger mapa manguba lanur aika lir anungji parnok asoshi lenmangtem lapoktsütsüla mesüra tarutsü putu timtemtsü, ta NSF-i Chief Minister dang ashi. Nagaland nung skill training institutes talila lapoktsü nungdaker aser ano saisapongertem timi anitettsüla. Anungji state sorkar kaketshirtem aser lanurtem asoshi mapa talila inyaktü mepishir, ta NSF-isa ashi.

**Office of the
LONGJANG MEDEMSANGER PUTU MENDEN
(Longjang Village Council)
P.O. Impur B.P.O. Longjang, Mokochung, Nagaland
TENÜNGSANG AGÜTSÜR**

Longjang Medemsanger Putu Menden-i 23 Impur AC nung **Shri. T.N. Manen**-i NLA election nung takok ngudaktsütsü atema pei senti vote enoktsür ajak dang pelar aser tenüingsang agütsür.

Onokisa pa nem takok anguba atema tepela osang lemsateper aser pai Mokochung District aser Nagaland den talisa constituency nung yimjung, azükaru aser terenlok bener arutsü atema Tulusang Tsüngremi pa maneni len aniang ta sarasademtsür.

Sd/- L. Chuba Jamir Chairman Longjang Village Council	Sd/- Alemtemjen Jamir Secretary Longjang Village Council
---	--

Sazolie College B++ NAAC accreditation nguogo



Kohima, Rongchii/April 1 (TYO): Kohima kübok Sazolie College, Jotsoma nem National Assessment and Accreditation Council (NAAC)-i Cumulative Grade Point Average (CGPA) of 2.87 at B++ Grade agütsüogo.

Sazolie College Principal Dr Gopal Basnet-i sangdong ka ajanga ashiba agi, college assessment aser accreditation

tanabuba cycle ya NAAC Bengaluru-i tentettsüba Peer team kati March 23 aser 24 nü agia liasü.

Paisa, college ya 2016 küm mezüngbuba asadang aser iba mapang CGPA 2.63, B+ Grade ngua liasü, ta ashi.

College yagi Nagaland nung jenjang aketba kaket shisatsü agüja tejakdangi odar ta shia pai, tang college-i Arts

stream nung Under-Graduate degree aser History o Political Science subject nung Post Graduate degree agütsüdar, ta ashi.

Maneni college-i, 2023-24 academic session nungi IDAN den longjemer Digital Marketing nung BBA aser B. Designing (Textile Designing) amala skilled based courses tem agütsütsü sentong lir, ta pai ashi.

Nungtugu linguist Rev. Dr. Vijay D'Souza-i Tetso College semdang



Dimapur, Rongchii/April 1 (TYO): Department of Linguistics aser Research and Development Cell, Tetso College, Chumukedima na longjemer march 30 nü "Language Endangerment in the Northeast: From Despair to Hope" onük nung ajemdaker sensaksem sentong ka ayongzüka agiogo.

Iba sensaksem sentong nung Director of the North Eastern Institute of Language and Culture (NEILAC), Guwahati Rev. Dr. Vijay A. D'Souza-i o jembia liasü. Dr. D'Souza ya Faculty of Linguistics, University of Oxford, Associate züngsem ka lir. Pa Arunachal Pradesh nung Hrusso kin den küm 20 dak tema inyakogo aser iba mapang orthography terenlok aser Hrusso oshi asüngsashiba nung teyari agüja liasü.

Sensaksem mapang Dr. D'Souza-i North East nung oshioben jenjang indang lemsatop. Alima nung oshi

7000 dak tema aliba nungi shilem 80 shi alima nung nütsünyongsük shilem 20 shi-i jembir ta ashi. India kübok North East kija nunga oshi 200 shi lir. Item oshi jembir ya 10,000 dak tajemba lir aser UNESCO's 2003 Vitality Index ajanga item oshitem sama aotsü ana nung lir ta sayuogo.

Dr. Vijay-i item oshi tem lendongbangi aiba kuli ya puti otsü aser tanü asüng tatalokbatem ajanga angatetdaksütsü merang. Paisa, oshi samatsü lendongi aiba ajanga item loktitem sobaliba samaba den shi temang aser tekelok shisatsü nung timtem adokba indang lemsatop.

Colonial kiburtemi item oshi ya tagidak maka aser uncivilized ta bilemba tanü tashi putu aika belenzüka aludar aser iba ajanga nüburtemi parnok oshi sentoka toktsür English aser Hindi amala oshitem angazüktsü

meranger, kechiyong item oshitem angazükba ajanga lokti nung parnok inyakyim tezübaba akümtsü aser mapa balala asoshi maongka timba angutsü ta bilemer. Iba amala tebilemdangba den külemi tanurtem tila asüandang oshi ka dak tali angazükra parnok mangmangtsü ta bilemdaksür. Tanurtemi parnok tila asüandang oshi ka dak tali angazükteret aser parnoki koda oshi timba angazükter yamaji parnok tekelok teyakyakba kümdaksür ta Linguists temi mapang talangka nung meteta lir aser sayuogo, ta pai ashi.

Arunachal Pradesh nung Hrusso-Aka kin den inyakba mapang tajangshiba indang jembidang Dr. Vijay-i, oshi wazüka ayutsü, zülua ayutsü aser asüngsashitsü atema lokti anidentsü koda tongtibang iba indang lemsatop.

Tatem nung pai, state administration-i parnok nem teyari agütsüba aser school tem nung bilingual mother tongue education takok ngua benokba lemsatopa liasü.

Maneni sentong nung pei oshi asüngsashitsü atema lanurtemi tasüngdangba balala asüngdangba Dr. D'Souza-i langzüa liasü. Pai, oshi wazüka ayutsü atema tajungtiba aser temelatiba tasaji akokba tashi pei oshi jembitsü aser pei oshi aser kin agi nema adangtsüba ya lir, ta ashi.

Mokokchung DC-i arms meyipa agitsü metetdaksür

Dimapur, Rongchii/April 1 (TYO): Mokokchung Deputy Commissioner, Shashank Pratap Singh IAS-i March 31 nü sangdong ka ajanga, 14buba Nagaland Legislative Assembly 2023 general election takokma nung agitsü atema ajak teküzmzüka kübok inyaksangshitsü atema nüburtem adenshiba tesem nung

license aliba prangbong hadirtem bener mesenzüktsü asoshi tenokdangba agütsür aliba Mokokchung District nungi aginogo, ta metetdaksü.

Maneni arms license alir shirnoki parnok indang prangbong hadirtem agütsüogo, parnok dang takaratiba nung item prangbong hadirtem meshitsü atema tetuyuba agütsüogo.

Kohima DC-i metetdaksür

Dimapur, Rongchii/April 1 (TYO): March 30 aser 31 nü Test Drive agiba mapang marks anguba dak ajemdaker Deputy Commissioner Kohima, Shanavas C, IAS-i sangdong ka ajanga interview atema shimba candidate tem indang tenüngtem DC Office Kohima Notice Board, RTO Kohima Notice Board aser District website: kohima.nic.in nung angutsü ta metetdaksüogo.

Maneni interview nung shilem agitsü aliba candidate tem ajaki original documents benoktsüla ta metetdaksüogo.

Kasa mapang nung DC-isa, Kohima nung April 4 aser 5 nü G20 Summit agitsü aliba dak sendakba nung Kohima yimti libaliro sayutsü tongtiba ta angateta yimti nung dokan kibur aser business establishment balalatem dang April 4 aser 5 nü pei dokan/ business aonung 7:30 ako tashi lapoktsü atema mepeshia metetdaksüogo.

Iba dak sendakba nung the Kohima District Chamber of Commerce & Industries danga iba osang ya agütsütsü aser temepeshiba benoka inyakdaksütsü atema jenjang tapet agitsü mepeshia metetdaksüogo.

Kasa sangdong ajangasa, Sl. No. 1 nungi 75 tashi interview April 10, 2023 nü 11:00 ako nungi tenzüka DC Office Kohima agitsü aser Sl. No. 76 nungi 150 tashi April 11, 2023 nü 11:00 ako nungi tenzüka DC Office Kohima nung interview agitsü ta metetdaksüogo.

Jalukie nung FSSAI Licensing & Registration Camp agi

Dimapur, Rongchii/April 1 (TYO): Food Safety Administration, Department of Health & Family Welfare kübok Administration aser Traders Union, Jalukie den longjemer Jalukie main town nung March 31 nü Food Safety Administration Dimapur zone-i licensing aser Registration camp ka ayongzüka katsüogo.

Sentong nungsa Designated Officer, Food Safety, Dimapur Samuel Zehol-i, food safety indang tongtibang tangatettsütem metetdaksü. Pai, FSSAI kübok Nagaland nung Food safety Administration hierarchy aser inyakyim balala benoka inyakba indang jembia liasü.

Iba camp ya chiyongtsü dak sendakba shishilembartem nem online FSSAI licensing aser registration system dak sendakba nung tangazükba agütsütsü nükjidong nung ayongzüka agiogo.

Kasa mapang nung Food Safety Officer Kezhangulie Yimchunger-i, FBO tem tinyaktsü, manufacturers tem indang labelling information aser home based FBOs, FSSAI license aser registration indang fee structure aser kuli atema talirtem ket nungi cash memo tem meshitsü koda tongtibang iba indang jembia.

Sentong nung okila Additional Deputy Commissioner, Jalukie Kiusumong Tikhir-i jembia liasü. Pai, Food Safety koda tongtibang iba indang lemsatopba den Act aser temzüng ozüng sülen anidaksüba aser license aser registration agizüktsüba indang FBO tem nem parnok shilem metetdaksü.

Iba sentong ya Food Safety Officer, Peren Samlamgwamlie Michui lenisüba nung agia liasü. FBO tem nem EC materials, Medical Fitness Certificate format aser labelling information checklist agüja liasü.



April 01, 2023 nü Ao Kaketshir Telongjem Dimapur Govt College purtem 46 buba lokti senden sentong nung ketdangpur aser Sanen luden nung shimer tasen purtem lokti nem metetdakja sarasadem mapang agiba noksa nung angur. Iba sentong nung AKTDGC nung advisor aser Christian Higher Secondary School nung principal Wb. S.Moatemsü Walling aser DGC nung Assistant professor Wt.Selina Walling nati tajungshi o jembia liasü.

Congress lenir Navjot Singh jail nungi chiokogo



Patiala (Punjab), April 01, 2023: Honibarnü Patiala nung aliba jail ka nungi Congress party lenir, Navjot Singh Sidhu chiokba sülen tangokba noksa nung angur.

Patiala (Punjab), April 01 (Agencies): Honibarnü Congress party lenir, Navjot Singh Sidhu Patiala Central Jail nungi chiokogo; pa jail nungi aluba mapang nung pa pusemertemi yimiyim ayima pa agizüka liasü.

Patiala Jail kima osangbenertem den jembidang taoba mapang Punjab state Congress Tir, Sidhu-i, "Ni ozü kibong atema masü saka state atema inyaker. Ni inyakra ajak ya Punjab tarutsü putu atema inyaker. Kü kinüngtsü cancer agi shiranger saka linük tenzüksüji tongtibangba," ta ashi.

Centre sorkar aija pai, parnokki state nung telesa adokdaksüba politics asayar, ta ashi.

"Linük nung kijai tashi amshibaji majung. India telongjemji Ambedkar mangdang liasü saka ibaji raksatsüdar. Hindutva onük matalokba mapang aser minority-i yimsüsüba tesemtem nung Centre-i telesa adokdaksüba politics asayar," ta pai ashi.

Sidhu-isa, pa küm ka jail nung puoktsü atema obendang agütsüba ya tim masü, ta ashi.

"Ni jail mashie ka nung puokang. Arrla 323 kübok shinga hopta ka dak tali jail nung mepuok, saka nibo küm ka puokogo," ta pai ashi.

Pai Punjab Chief Minister, Bhagwant Mann aser Delhi Chief Minister, Arvind Kejriwal nata aija, Punjab nung election mapang nangzükbatem ama meinyaker, ta ashi.

Sidhu-i, "Ni küno Bhagwant Mann dang ya asüngdangner-sorkar makümdang nai aika nangzük. Nai aika nangzük saka meinyaktet. Bargari ken o nung ochi obendang Kejriwal aser Bhagwant Mann nati menotsüogo. Mapa lakh 1 nangzükba ama magütsüteter.

Osangkakettem aser advertisements nung ang Bhagwant Mann angur," ta ashi.

Sidhu-isa, pai Punjabi nung kentener, asür Sidhu Moosewala'er ki semdangtsü aser Punjab tensa atema

jembitsü, ta metetdaksü.

Honibarne Congress lenirtem aser pa pusemertemi pa agizüksü atema Patiala jail kima adenshia liasü. Pa jail nungi aludang parnokki 'Navjot Sidhu zindabad' ta ayimdena liasü.

1988 küm Patiala nung Navjot Singh Sidhu aser par medemer ka, Rupinder Singh Sandhu nati gypsy gari Sheranwala Gate crossing anasa gari lenmang tiyong nung anena ayuba agi arrshi küm 65, Gurnam Singh-i gariji ainshiang ta ashi. Iba sülen Sidhu-i tejashi nung Gurnam dak mejungi azükba sülen ajen. Iba nisungbaji Rajindra Hospital-i anir ao saka süadok.

Iba ken o nung Supreme Court-i pa aitsüba sülen yaküm May 20 nü pa jail nung puoka liasü.

Iba ken o nung pa aija pa küm 1 tepuokdak ayutsü obendang agütsü aser taküm May 16 nung ang pa jail nungi chioktsü liasü, ajisüaka pai jail nung yimya tajung benshia aliba agi anojungi kümsük matongdang chioker.

UP nung anti conversion ozüng kübok nisung 7 anema ken o benok

Lucknow, Rongchii/April 01 (Agencies): Uttar Pradesh state kübok Budaun district nung Hindu nung ka Islam yimsü dangi meyipdaksü, ta tai tongloktsüba ken o nung police-i nisung tenet anema ken o benokogo, ta police officer kati metetdaksü.

Police officer-isa, "Onoki iba tatalokba bushisüngdangdar aser Uttar Pradesh Prohibition of Unlawful Religious

Conversion Act kübok ken o benoka tai tonglokja alirtem aputsü merangdar," ta metetdaksü.

Muslim nungertemi arrshi küm 22, Rahul Sharma Islam yimsü dangi meyipdaksü, ta shia Rahul Sharma tebuti FIR ka agütsüba nung ajemdaker ken o ka benok, aser tang iba tatalokbaji bushisüngdangdar, ta Superintendent of Police, Amit Kishore-i metetdaksü.

Hokolbarnü police team kati Rahul Sharma dang-a asüngdangyaogo.

Sharma tebuti ashiba agi, Rahul Sharma 'gym'-i oa liasü aser yangji parnokki pa mesüzüka Islam yimsü dangi meyipdaksü.

Islam yimsü agizükba sülen nungi Rahul Sharma-i Ramzan mapang nung lumir (roza) aser 'namaz' sarasadem agir, ta tebuti metetdaksa liasü.

April-June nung India tesem aika nung tatsük asütsü: IMD

New Delhi, Rongchii/April 01 (Agencies): India northwest aser peninsular region dak alaka India tesem aika nung April ita nungi tenzüka June ita tashi maximum temperature ji normal dang nungi tali asütsü, ta Honibarnü India Meteorological Department (IMD)-i metetdaksü.

Kasa mapang nungjisa Central India, anüdoklen aser northwest India tesem aika nung kanga tatsük asütsü, ta IMD-isa metetdaksü.

Video conferencing ka ajanga osangbenertem den jembidang IMD director general, Mrutyunjay Mahapatra-i, "Bihar, Jharkhand, Uttar Pradesh, Odisha, West Bengal, Chhattisgarh, Maharashtra, Gujarat, Punjab aser Haryana state tem nung

tatsük anogotem teimba asütsü, ta asadangtetogo," ta metetdaksü.

"2023 küm tatsük mongpu (April nungi June tashi) nung linük tesem teimbaka nung maximum temperature ji normal dang nungi tali asütsü. South peninsular India aser northwest India tesem kar nung maximum temperatures ji normal mesüra normal kübok asütsü," ta pai ashi.

IMD-i, April ita nung tzunglu normal arutsü imlar, ta metetdaksü.

"Northwest India, central aser peninsular region tesem teimbaka nung tzunglu normal mesüra normal dang nungi teimba arutsü aser anüdoklen aser northeast India tesem aika nung tzunglu normal dang nungi tajemba arutsü," ta IMD-isa metetdaksü.



April 01, 2023 nikongdang Madhya Pradesh yimtiba, Bhopal nung aliba Rani Kamalapati railway station nung Ato kilonser, Narendra Modi-i Bhopal-Delhi Vande Bharat Express train tenzüksüdag tangokba noksa nung angur.

Excise policy ken o nung Delhi court-i Sisodia nem bail magütsü

New Delhi, April 01 (Agencies): Delhi excise police ochimashi ken o nung taoba mapang Delhi Deputy Chief Minister aser Education Minister, Manish Sisodia-i bail temepishiba agüja liasü saka Delhi Court-i pa nem bail magütsü.

Excise policy dak sendakba nung CBI-i Sisodia anema benokba ken o nung Special Judge, M K Nagpal-i Sisodia indang bail temepishiba magizük.

March 24, 2023 nü Rouse Avenue Court-i AAP lenir, Sisodia indang bail temepishiba agizüka liasü. Delhi Excise Policy 2021-22 dak sendakba ken o nung taküm February 26 nü CBI-i Sisodia pua liasü.

Tang Sisodia ya judicial ket nung lir aser April 3 nü court matsüngdangi anir aotsü.

Kasa ken o nung tai tonglokja alir tangar nembo bail agütsüogo.

Court nung bail temepishiba anagadanga mapang nung CBI tenüng nung advocate, DP Singh-i, "Pa nem bail agütsüra ibaji ajanga onoki bushisüngdangba maparen

nung tetsükdaksü ajurutsü," ta metetdaksa liasü.

Bail temepishiba anema Singh-isa court dang, "Sisodia-i pa indang phone upgrade asütsü atema phone raksa ta ashi, ajisüaka pai yamaji meinyak. Phone nung kulitem agentsü atema pai yamaji inyakra asütsüa akok. Pai (Manish Sisodia) tayimtsü nung jena maotsüa akok saka pai kulitem raksatsütsü, anungji pa nem bail magütsüsüla," ta ashi.

National Capital Territory of Delhi nung tamalen Excise policy nung ochimashi liasü aser ketdangsertemi sübokrem agi, ta tai tonglokja CBI aser ED-i iba ken o bushisüngdangar.

Tamalen trial court-i, tai tonglokja alisangi (Sisodia) iba ken o bushisüngdangba nung amaliteper, ajisüaka pa dang asüngdangyaba mapang nung temelung asütsüsa pai telangzüba magütsür, ta metetdaksa liasü.

Tamalen Sisodia-i Supreme Court nem bail temepishiba agüja liasü saka court-i pa dang iba ken oji Delhi High Court nem agüjang, ta tuyu.



April 01, 2023 nü New Delhi nung BJP Kisan Morcha zungsemtemi Chief Minister, Arvind Kejriwal'er kima longkak aita takhangba agütsüba noksa nung angur. Tzunglu ajanga alu nung aonsotsü raksatsüba atema aluyimertem nem senotsü teyari agütsüba den külemi electricity bill atema subsidy agüjang, ta parnokki takhangba agütsü.



TIR YIMYIM YIMOBILEM (EDITORIAL)

DIMAPUR AMUNGNÜ, RONGCHII (APRIL) 02, 2023

Tsüngremi mulungba tejashi

Asenok taküm nung atalokbatem rongnung tamajungtibaji tejashi lir, anungji asenok shingaia tejashi maginer. Ajisüaka, asenok taküm nung ajuruba tejashitem rongnunga Tsüngremi mulungba tejashia lir na (?) ta bilemdangtsüsa akümer, kechiyong tanabuba Korint 7:10 nung ashir, " kechiyong Tsüngremi mulungba amato jashidaktsübai tanaben mesasatsüsa tekümtet asoshi temulung meyipdaktsür." Ibai tesüngmangtsü o aser angatetsü asoshi kanga tasak Laishiba tekong ka lir. Ajisüaka, kodang asenoki sarasadema bilemdangdir, atangji Tsüngrem taochi meteta jashiba o memeteti jashiba na asenoki asenoksasa bendangtetsü. Tejashiji tejashi, anungji Tsüngremi mulungba ama jashiba aser memulungi jashiba ajak nung temulung kanga kuremer. Ajisüaka, tepilaji Tsüngremi mulungba nung jashiba ajanga tekümtet angur saka Tsüngremi memulungba ama jashiba nung kasa Laishiba tekong nungjisa ashir, " Tsüngremi mulungba ama masü saka alimai mulungba ama jashiba agi tasüba adokdaktsür." Atangji, tejashiji langka tamakok mesüra takoksa anguba nungi adoker. Ibaji tim dang lir. Ajisüaka, kodang asenok jashiba ajanga ano meyiper tangar dakang tai tonglokja mesüra ano Tsüngremang tali jashitsüsa inyakdir, ibaji Tsüngremi memelungba tejashiji aji asütsü. Laishiba nung kasa tejashiji Yihuda Iskariot-i ajuruba angur. Pai alar ka jenjang taribi sen tejang 30 agi Tsüngrem chir Yisu Khrista ayok aser kangki nung reshikangshia südaktsü. Atangji, pai aibelenba pai pasasa rajema aru aser kanga jashi. Ajisüaka, pai Tsüngrem bushi masü nisungang bushi aser Yisu tsüngdangi taidok meshia aotsü melen pa kija azüngmeyakdak tesem bushia oagi tasüba ajuru. Yihuda Iskariot-i pa tai asoshi kanga jashi saka kodanga pai Tsüngrem tsüngdang taidok menangzük. Pai pa mapa asoshi jashia bilem saka pai par külem medemer Yisu Khrista nütsüngtem toa bushi mao. Iba ama tejashiji Tsüngremi maginür. Tsüngrem anema aibelen saka asenoki taidok menangzük aser külem adianu aser arogo purtem bushia oagi sarasadema tesendaktep akangshitsüa memeranger. Asenoki aibelenba asoshi jashia bilembaji Tsüngrem tsüngdang asenoki taidok nangzük ama asenoki mebilemtsüla, ajisüaka asen tejashi temulungjangji Tsüngrem nem agütsütsüla aser külem adianu aser pur medemertem den külemi longjema Tsüngremi mulungba mapa inyaktsü jangratsüla. Laishiba nung Yisu nütsüng Peter-a kanga jashiba asenoki angur. Pai kilitsür ka tsüngdanga Yisu Khristaji pa kibur aser kümtetdakba ta menangzük. Ajisüaka, kodang pai Yisui ashiba bilemtet, pai pasasa pa dak tashimait aliba angu aser aibelenba atema kanga jashia bilem. Atangji, Yihuda Iskariot jashiba o Peter jashiba naji kasa, kechiyong tenapronglai pai aibelen mapa asoshi kanga jashia bilem. Ajisüaka, tetsüngdaji aibelenbaji masü saka aibelen külena Yisu tsüngdang taidok nangzüka moutetba aser otetba na liasü. Kodang Peteri pa tai asoshi kanga jashia bilem, pai ajep. Peter ajepbaji tejashi aser tesasaba dang masü saka atangjila nung temulung meyipba liasü. Iba mapang nungi Pai Kibuba Yisu Khrista bushia par külem medemer nütsüngtem den aliba asenoki angur. Peteri jashia azüngmeyakdaka mao saka Yisu Khrista bushia oa ano tanaben par medemer nütsüngtem den longjem. Iba sülenbo Peteri Tsüngrem anema tai menaba asenoki mangur aser mangashir. Aji oda, kilitsür ka tsüngdang Yisu Khrista menangzüketsang to agi, Yisu Khrista asoshi reshikangshi arem aser taküma bendanga agütsü. Kodangsa asenok taküm nunga asenok jashitsüsa ataloker, iba tejashi jagi Tsüngrem nungi asenok pilatsüsa asenoki meinyaktsüla. Atangji, nai aibelenogo ta rajem nungji nai nüsasa nü dak kanga jashia bilemtsü saka ibaji Tsüngrem tsüngdang taidok nangzükba ama nai mebilemtsüla. Kodangsa asenok jashia aitdir, asen taküm nung Tsüngremi mulungba inyakdaktsütsüsa asenok taküm aser temulungjangji Tsüngrem nem agütsütsüla. Idangji dang Tsüngremi asenok jashibaji tesünep agi melentsütsü aser tekümtet angutsü.

OLEMSABANG

PALM SUNDAY OSANG : (PALM SUNDAY NUNG GADO-A TETOSHI ANGU!

~ Mr.I.Ben Jamir, Missionary Atlarge, Aoyim Chemoukidema

Temeim Adianutem, Temeshi Laishiba Osangtajung kaket pezü nung Yisu Khrista Yirusalemi takok ngua aiba indang shia angur. Ibai Süyia aoba (Passover,) benjongmong mapang Yirusalem aser meküta aliba yim ajak benjong nung atentsü arurtem ainertem sendena aliba mapang ka liasü. Kodang Yisu aser Pa nütsüngtem Olive tenem nung aliba Bethphaga aru, Yisui Peter aser Yohan Bethpaga yim jagi gado ka bener arutsü yok, iba gado ya techanu (Colt) aser kodanga nisungi memendangba gado techanu ta Lai nungji shia lir. Gado dak kodang sanger arudir ibaji yimjung osang abenba temaitsü nung amshir aser kodang Kor (Horse) dak sanger arudir, ibaji rarai aoba temaitsü nung amshiba ta takzür. Yisu Khrista gado dak sanger aruba tetzü ya Pa nem tebu nungloktsüba wadang nung temenenpurtem Pa taochi agi alangzükba takok ta sayuba temaitsü liasü. (His mission of redemptive grace). Kodang parnoki gado chanuji bener aru, parnoki abena aliba süji agizüker gado rongdong nungji lemetsü aser Yisu yangji mendaktsü, Gado techanu ka dak Yisu küm 33 tain temang taretji la temang jagi tezükta ajemalua aser tashi anga-a mendaktsü. Ajisür nütsüng denji tangar kar tensemer telok tilakaji Yirusalem lenmang leni apusoa ao. Kobi melie Yisu Khrista Yirusalem leni arudar ta osangji prokshia ao aser aji angashia Bethany yim aser tanga tesem balala nungi nisungtemji telok tuluka kümer Pa tejaklen aser tesülen anitaka ao. Parnok rongnung takartemi pei sü agizüker Yisu aotsüba lenmang tejaklenji lemetsü aser sü makartemi asang tu aser tanga süng kongsangtem lepzüka bener arua lemetsü. Israel nunger asoshi Asang tuji takok tulu anguba aser tepela temaitsü mapang nung amshir. Anungji telok tulu jagi Yisui temenen tongpang madak takok tulu anguba temaitsü sayua telok jagi asang tu amer aji ayipshia ' Hosanna, Hosanna (save us) Tsüngrem tenüng nung shiba arur Pa sangang, asen Tebu Dawid yimli koba arur sangang, Tematiba nungs Tsüngrem sangang ta ayimtena anitak. Kodang Pharisee temi ya ngua tenük merema bilem aser Yisu dang parnokji songtemang ta ashi, Yisui langzua ashi, Item telok yagi mayimtenra idangji yakta lungtem jagi ayimtentsü ta langzü. Kodang telokji Yirusalem atong, idakji alirtemi nünngnüngtepa ashi, Ya shiba? Teloktemi ashi, ibai Galil nungi aruba Nazaret nunger ainkar Yisu. Iba ya süyir külen Yisui tenla kidangi atu aser ki telung nung tayoker aser talirtem, sen melenertem, guduru ayokertem langpang meküpdoktsü aser Pai ashi, Kü ki dang Sarasadema ki ta ajatsü, saka nenoki aji rakzükraakter leprungki kümdaktsür. Yisu Khrista Yirusalem tenla ki meshitetba tetezü ya asen meimchirtem temolungjang temenen agi sünga aliba Pai meshitetsür ta sayur.

GADO CHANU-A TUSHISEM :

1. Yirusalemi takok ngua aiba benjong nung ya takartemi sü tajungtiba lemetsüba, asang tu aser tanga süngsangtem lepzüka lemetsüba nung ya Yisu tetsüngbu majemok, saka gado chanu tetsüng dang jaja. Kechiaser la rongdong nung Yisui mena liasü ta angateta atadi. Palm Sunday ya asenok Khristantem asoshi tepelatiba anogo kechiaser ibai alima temenen madak Yisui takok tulu ngua Pa anemer tsükchirtem aliba Yirusalem yimti jagi tasü ita aiba lir. Yirusalem yimti nung tanü tashi Palm Sunday nung iba jelushi benshia amonger.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tayimtsü lendong nungi kümzüksang pastor-i sentep agi tenzükogo



March 26, 2023 nü Germantown, Tennessee nung aliba Harvest Church nung pastor, Kennon Vaughan-i pa kinüngtsü, Kathryn den külemi nokdaker Tsüngrem O jembidang tangokba noksa nung angur.

April 01, 2023: Taküm January ita nung tayimtsü tilaka tsükokba lendong nungi kümzüksang pastor kati, iba tatalokba ajanga pai kodak lima kanga yongyar, aser kenü anogobo pai iba lendong nung asür Arogo züngsem pezü den longjemtsü, ta metetdaksü.

Pastor, Kennon Vaughan ya Germantown, Tennessee nung aliba Harvest Arogo nung tongti pastor inyaker. January 17, 2023 nü pa tayimtsü lendong nungi kümzükba sülenbo tang mezüng (March 26) pai Tenla kidang Arogo züngsemtem den Tsüngrem O jembia liasü.

Pastor Vaughan-i, pa iba lendong nungi kümzükba ya Tsüngremi sayatenya agi pa kümzükba liasü, ta ashi.

Paisa pa surgery agiba aser taneptsü anguba indang lematep.

Vaughan-i iba lendong nung asür kibongtem atema aria

bilemetsüba lemsatepdang pai, "Ni par pezü kanga meima liasü aser tang parnok Kibuba den lir, kechiyong parnok tekümtet tejangja angurtem lir," ta ashi.

"Parnoki Yisu ajurutsü anasa ni parnok den külemi ni alibaji ni asoshi akhümket," ta pai ashi.

"Atangji nung tang panok yangji (kodak) lir. Ni parnok den külemi menüteptsü aser külemi Tsüngrem külemtsü yongyar. Ni metet, iba anogoji arudar," ta pai ashi.

Vaughan-isa pa atema sarasademtsür ajak dang pelaba lemsatep.

"Tayimtsü tsükokba tesem nungi ni Victoria nung aliba hospital kati anir aodang ni temelung kanga raksa. Ambulance nungji tebur ana den tetsür ka liasü; ni parnok kodanga mengudang. Parnok rongnung kati kü kinüngtsü den jembia liasü. Anungji lendong atalokba osangji prokshitsü ta ni

meteta liasü," ta pai ashi.

"Nenoki ni asoshi kodak kishizüng ajak anokshija sarasademtsüdar, ta ni bilema kü melungjang nung tesünep liasü. Ni kümzüksü asü asütsüar ni memeteti liasü saka nenoki sarasademtsübaji Tsüngremi angashidar, anungji Tsüngremi Pai melungba inyaksü ta amanga kü melungjang nung anisüngzük liasü," ta paisa lemsatep.

Gol ka dang aketba Piper PA-46 tayimtsüji Texas kübok Yoakum Municipal Airport-i aoba mapang nung tsükoka liasü. Iba tayimtsü nungji pastor densema nisung pongu liasü saka pastor dang kümzük. Iba lendong nung asür nisung pezüji Arogo executive Tir Bill Garner, Arogo nung deacon Steve Tucker aser Arogo nung züngsem ana- Tyler Patterson aser Tyler Springer nung liasü. Iba tayimtsüji Tucker-i ania liasü.

Iraq nung Khristantemi election nung shilem magitsüa akok

April 01, 2023: Iraq nung bishops council kati sorkar dang legislature nung nütsüng ajema aliba Khristantem atema wazükja aliba menden kümzükba ayutsü akhangba den külemi sorkar dang, iba takhangbaji mataloktsüra Khristantemi election nung shilem magitsü, ta metetdaksüogo.

March 31, 2023 nü Mosul aser Nineveh Plain nung aliba Catholic aser Protestant Arogotemi tentetba Nineveh Council-i külem sangdong ka ajanga, electoral system nung minority Khristantem nem menden peria melezmüksüba atema tebilemstü akaba metetdaksü.

Külem sangdong nungji Mosul-Aqra nungi Chaldean Archbishop, Najib Mikhael Moussa aser Mosul nungi Syrian Bishop, Nicodemos Daoud Matti Sharaf na den lenir kari sign süa lir.

Assyrian Church nung Bishop Isaac Yousif, Mosul nungi Syrian Catholic Archbishop Benedict Younan Mubarak Hano aser Ancient Church of the East nungi Bishop Chamoun Daniel nungeria sangdong nungji sign süa lir.

Khristantem nem lemzükja aliba menden yimtenren party kari rakzükba sülen Nineveh Council-i sorkar nem item takhangba agütsür.

"Khristantem nem lemzüksüba menden atema voters ji Khristantem asütsüla, ajisüaka yamaji meinyaker," ta sangdong nung shia lir.

"Khristantem nem lemzüksüba menden atema Khristan masüba nisungtemia vote agütsür. Ibaji ajanga tongti party temi minorities atema lemzüksüba menden nung shilem agir," ta parnokisa metetdaksü.

Iraq Parliament nung menden 329 lir; minorities nem menden 9 lemzükja lir aser iba nungjagi Khristantem nem menden 5 lemzüksüba densema lir. Khristantem nem lemzüksüba menden ponguji Baghdad, Nineveh, Kirkuk, Erbil aser Duhok provinces nung lir.

Bishops council-isa Khristantem nem lemzüksüba Parliamentary menden pongu nungji vote agütsütsü temsüa alir Khristantem aser tokteptsüpur Register asütsü mepishi.

"Iba amaji register asüba ajanga Iraq nung linük temzüng aser Supreme Court-i tuyuba ama election inyakyim tajungba akümtsü," ta parnok metetdaksü.

Council-isa MP tem dang, election inyakyim teladak mesüra Khristantemi parnok candidates atema lemzükja aliba mendenji agientsü aser election nung shilem magitsü, ta metetdaksü.

2021 küm legislative elections

nunga Khristan candidates nem lemzüksüba menden lemsaba aser inyakyim tsütsü mangatetep tulu adoka liasü.

2021 küm nungi Bethnahrin Patriotic Union deputy chairman, Joseph Sliwa-i, Khristantem mnem wazükba toktsüba menden pongu nungi shimtetba legislators ji Iraq nung Khristantem masü tangar dang liasü, ta aija liasü.

Paisa, par pongu nemji votes shilem 90 agüja liasü aser ibaji Khristan voters-i agütsüba vote masü, ta metetdakja liasü.

2018 küm elections nunga Shiite aser Kurdish nung teloki Khristantem atema lemzüksüba menden nungi tokteper par candidates nem vote agüjang ta tuyua liasü.

2021 küm elections nung Khristantem atema lemzüksüba menden pongu nungi menden pezü nung "Babylon Movement"-i takok angu. Parnok ya Khristan pusemertem ta parnok ashir, ajisüaka iba telok ya Shiite telungpurtem den tesendaktep aliba telok ka lir.

US-i Iraq mamakba mapang nungbo 2003 küm Iraq nung Khristan nütsüng million 1 dak tema liasü, ajisüaka telok balala tsüngda rara aser Islamic State kiralongrartem yimsüsüba kübok Khristantem aikati Iraq toktsür ajen. 2021 küm tashi nungbo Iraq nung Khristan nütsüng 300,000 (lakh 3) shi dang kümogo.

ANOGO ABEN TSÜNGREM DEN

KECHI AGI TSÜNGREM PELADAKTSÜR

"Idangji shitakba tenlatem, tarungba aser rangben tarungba tenla nai pelatsü"

~ T.Ken 51:19

Asen sasa pela-a alitsü akok. Asenoki tangar ah peladaksütsü akok. Saka iba dang taoba asenoki Tsüngrem peladaksütsüla. Dawidi pa temenen nangzükba pa sarasadem atem. "Idangji temeshiba tanela nung, tarungba aser rangben tarungba tenla nung nai pelatsü (T.KEN 19). Aseni inyakba ajak agi Kibuba peladaksütsüla.

A.W. Tozeri ashi, "Tsüngrem den aotsü tasak masü". Aji ochi. Kenü Dawidi ashi, "Ni Kibuba ket nung tsükdi, ... saka ni nisung ket nung tetsükdaksü. (2 Sam.24:14).

Tsüngremi asenok metet, meimer aser aremzükter. Pa sentong ajak asenok ajungtsü, pelatsü aser pa sentsüwangshi asoshi lir. Anungji kechi agi Pa kanga peladaksür? Tashi angaa jajaba, tarungba tenla masü. Dawidi ashi, "Temulung meyipa medeni ni tarungba tenla bener arura, nai magizüktsü.

Iba ken Dawidi jangratemtsü ka nung aten, "Nai mulungba ama Zion dang tajung inyakang: nai Yirusalem tsüki yangluang" (T.Ken 18). Dawid pa temenen nung lurepa aluya liasü, menoktaket. Tsüngrem atalatsüba pai tsükchir ket nung agütsüya liasü. Tang Dawidi ashi, "O Tsüngrem, kodang ni temenen bensi ni lurepya liasü. Ni na mepeladaksü. Tang ni na peladaksüner. Ni na peladaksü nung ni yanglushitsü" na lureper asü yanglur?

SARASADEM:

Tsüngrem ni na peladaksür ka ama alitsü nai ni yariang. Amen.

Chosen Church meshiteta tenzükogo



March 31, 2023 nü 'Chosen Church' tenzükba sentong nung Koinonia Baptist Church pastor, Medotseilieü Kiewhuo-i jembidang tangokba noksa nung angur.

Kohima, April 01 (TYO): Arogo ya tongti tongshi ka asütsü 2013 küm October ita nung Alvy aser samaba tanelatem Bishal-i tentetba Believers Fellowship Ministry Hokolbarnü (March 31, 2023) official süa 'Chosen Church', ta sangdongogo.

Iba Arogo nung toklang tenzükter pastor ji Alvy Bishal asütsü.

Arogo tasen meshiteta tenzükba sentongji Koinonia Baptist Church (KBC) pastor, Medotseilieü Kiewhuo-i ketdangsüa agi, ta sangdong ka ajanga metetdaksü.

Pastor Kiewhuo-i Mathi 16: 17-19 nung ajemdaker, iba

asütsü aser samaba tanelatem jenokdak asütsü ayongzük.

Laisa, meshiteta aliba Arogo ka nung süngjang tajung atangba indang lemsatepba den külemi Arogo nung dang masü saka iba dak alia oa inyaksü ayongzük.

Kasa sentong nung lai shirangertem atema sarasademtsü aser Kibuba tenzüktsü telemtetba agia alirtem atema sarasademja liasü.

Chosen Church ya Kohima nung MK market, Razhü point anasa aliba Medikhrü complex 3rd floor nung lir.



Bucha nung Russia nungertemi maneni amakba mapang Ukraine nung sepaitem tank tem nung mener yimtung süiba noksa nung angur. Tir Volodymyr Zelenskyy-i Hokolbarnü ashiba agi, Bucha nung Russia nung sepaitem inyakyim ya Ukraine nungertemi kodanga tai matoktsü. Kyiv anasa aliba iba jila ya anogo 33 sülen tanaben meyipa agiogo.

Russia-i UN Security Council tir mapa abenba Ukraine-i magizüker

Kyiv, Rongchii/April 1 (Agencies): Russia-i UN Security Council tir mapa agizükogo. Ukraine-i Security Council züngsemtem dang iba jenjang agiba ya nokdangtsü atema mepeshiaka Russia-i tir mapa agizükogo.

Council nung züngsem 15 lir aser züngsemshiai melentepa tir mapa ya ita kaka abener.

Russia-i tesüsa tir mapa ya 2022 küm February ita bena liasü aser iba mapang parnokki Ukraine amak tenzük.

Iba tetezü Security Council ya, rara nung aibelenba atema aputsü atema tetuyuba agütsür aliba tir kati aniba linük kati anir.

International Criminal Court, koba UN indang institution ka masü, iba court yagi taoba ita Vladimir Putin aputsü atema tetuyuba ka agütsüogo.

Iba jenjang agiba atema Ukraine-i ashishiaka, United States-i ashiba agi, parnokki tir mapa mebendaktsütsü atema Russia menokdangtet, shirnok permanent council züngsem ka lir.

Tanga permanent züngsemtem rongnung UK, US, France, aser China densema lir.

Iba shilem ya yimya ka dang ajisüaka UN dangi Moscow indang ambassador Vasily Nebenzia-i, Russia indang Tass news agency dang ashiba agi, arms control densema tanga onüktem benoka sensak

asemtsü asoshi pa sentong lir. Ukrainian Foreign Minister Dmytro Kuleba-i, Russia-i tir mapa abenba ya April Fool's Day nü ajak dang asayamenü tulutiba ka aser iba ajanga international security architecture inyakyim nung langka tai lir ta lephsia metetdaksür ta shiogo.

Kasa mapang nung Ukraine tir adviser, Mykhaylo Podolyak-i ashiba agi, iba ya international temzüng ozüng raksatsüba ka lir. Rara menaba, humanitarian aser criminal law sülen manidakba, UN Charter raksatsüba aser nuclear safety sentoka toktsüba linük kati kodaser alima nung tongtibangtiba security body tekolak mapa abentsü, ta pai ashi.

Taoba küm Volodymyr Zelensky-i Security Council inyakyim yanglushitsü mesüra loksatsü asoshi ayongzükba den Russia-i Ukraine amakba nokdangtsü atema jenjang peria magiba atema aija liasü.

Paisa, Russia nem UN Security Council züngsem jenjang magütsütsü ayongzüka liasü.

Ajisüaka, US-i ashiba agi, iba dak sendakba nung parnokki kecha minyaktetsü, kechiyong UN charter ajanga permanent züngsem ka intoktsü asoshi tenokdangba agüja lir.

"Tia maka Russia ya Security Council nung permanent züngsem ka lir aser

iba ya melenshitsu atema temzüng ozüng kübok kecha lenmang mali," ta White House press secretary Karine Jean-Pierre-i iba hopta posangbenertem den sensaksemba mapang ashi.

UN Security Council ya international lokti tentet ka lir aser alima nung yimjung benoktsü atema parnok khuret lir.

Security Council nung linük pezü permanently züngsem lir.

Iba telok nung züngsemtem ya non-permanent züngsem linük 10 den külemi inyaksangshir.

Security Council nung permanent züngsem ka ama Russia amenoka aliba tetezü parnokki resolutions magi kümdaktsütetsü.

Security Council vote ka agizüktsü atema vote tekubo nüngdaker aser permanent züngsem kati danga bangzüng anema vote magütsütsüla.

Taoba küm Russia-i Ukraine amakba anendaktsütsü atema benokba bangzüng ya Russia-i magizüki liasü. Vote agitepba mapang China, India aser United Arab Emirates-i vote magütsü.

Maneni September ita Ukraine nung Russia-i ozüng alema tesem pezü atsüngba magi kümdaktsütsü atema bangzüng ka benokba Russia-i magizü. Iba bangzüng atema vote agütsütepba mapang Brazil, China, Gabon aser India-i vote magütsü liasü.

Iran nungi kiralongrartemi Pakistan nung sepai 4 tepset

Islamabad, Rongchii/April 1 (Agencies): Pakistan army-i sangdong ka ajanga, Iran nungi kiralongrartemi pakistan border patrol sepai pezü tepsetba osang metetdaksüogo.

"Iran tsütsülen inyaksangshiba kiralongrar telok kati Pakistan aser Iran na arrtsü nung Pakistani security forces border patrol telok ka maka liasü," ta military media wing ISPR-i Honibarnü metetdaksü.

"Tarutsü nung iba amala lendong majurutsü atema Iran tsütsü inyaksangshiba kiralongrartem azüoktsü atema Iran nung ketdangsurtem den tinyaktsü maparentem benoka inyakdar," ta army-isa ashi.

Iba lendong ya southwestern Baluchistan province kübok Kech district nung ataloka liasü. Iba district ya Afghanistan aser Iran na

den arrtsü nung lir kong temzüng ozüng tejangja ka benoka mali.

Sepaitem amakba ya tang tashi nung telok kati danga nangzüka mali.

Pakistan aser Iran na arrtsü 900km (45 miles) dak tema lir. Taoba mapang nunga arrtsü nung timtem lendong aiben ataloka aruogo.

Iba tesem nung amenoka aliba Baluch nationalist teloktem ashiba agi, parnok iba tesem nung adokba alirongsen shilem tolung junga agitsü atema rara. Baluch nationalist teloktem ya arrtsü adena linük anaprongla nung inyaksangshia arudar.

January ita iba province kübok Bolan district nung passenger train nung bomb pokdaksüba sülen passenger 13 yirua liasü.



Hokolbar aonung Illinois' Belvidere kübok Apollo Theatre kilem chirepba sülen nisung ka süogo aser aika yiruogo, ta CBS2-i metetdaksü. Iba tesem adena yipru tesashi ka süla aoba sülen iba kilem chirepa liasü.

Taliban-i tetsürtemi achaayangba Afghan Station ka shibangtsü

Kabul, Rongchii/April 1 (TYO): Afghanistan nung tetsürtemi achaayangba radio station ka nung Ramadan temeshi ita ken/music atemba atema shibangtsüogo, ta Taliban ketdangsur kati Honibarnü ashi.

Sadai Banowan koba Dari oshi nung tetsürtem ola lir, iba ya Afghanistan nung tetsürtemi achaayangba station ka lir, koba küm 10 tejakdang tenzüka liasü. Iba station nung staff ti lir aser parnok ti rongnung tetsür trok lir.

Badakhshan province nung Information and Culture director Moezuddin Ahmadi-i ashiba agi, iba station yagi Ramadan mapang ken aser music tema Islamic Emirate indang temzüng ozüng nung aiben aibelenogo aser ibayongji shibangtsüogo.

"Iba radio station yagi Islamic Emirate of Afghanistan indang policy agizüka iba amala aibelen ya tanaben memenatsü ta tenangzükba ka agütsüra onoki iba station tanaben lapoktsü melatsü," ta Ahmadi-i ashi.

Station tekolak Najia Sorosh-i ashiba agi, parnokki aibelen kecha memena aser iba station shibangtsütsü kecha nüngdak maliasü. Lai, iba inyakyim ya meim maparen ka

lir, ta ashi. "Taliban-i onok dang nenoki music atema ta ashi. Onoki kecha music matem," ta lai ashi.

Sorosh-i ashiba agi, Brehostibrarnü 11:40 ako nung Ministry of Information and Culture aser Vice and Virtue Directorate nungi züngsemtem station-i aru aser shibangja liasü.

Laisa, station staff temi Vice and Virtue den tongtepratepogo ajisüaka ketdangsurtemi station shibangtsüba indang osang talila magütsü, ta ashi.

2021 küm Taliban-i sorkar atsüngba sülen osangbenertem aika mapa makai kümogo. Senotsü peria maliba ajanga mesüra staff tem linük toktsür jena aoba ajanga Media outlet tem aika shibangogo, ta Afghan Independent Journalists Association-i ashi.

Taliban-i sorkar atsüngba sülen tetsürtem mapa aika nung inyaktsü memelar aser iba den tetsürtem university densema sixth grade adena azüngtsü memelar. Ajisüaka tang tashi nung music nokdangbabo officially sangdonga mali. 1990s tatemlen parnokki yimsü asüba mapang Taliban-i linük nung television, radio aser osang kaket ajak tenokdangba agüja liasü.



US Vice President Kamala Harris aser Zambia tir Hichilema na tanokba noksa nung angur. Vice President Kamala Harris ya tang Africa nung rongsenketzüng aser security terenlok atema linük asem semdangba mapang ka lir. Zambia semdangba mapang Harris-i la tebou PV Gopalan bilemteta Lusaka nung Gopalan'er kinungertem semdanga liasü. PV Gopalan ya Indian foreign service ketdangsur ka liasü.

1buba NECDC asayamung semifinal osang



Interstate Senior Men's Friendship Tournament semifinal Nagaland aser Meghalaya na tsüingda asayaba noksa angur.

Dimapur, Rongchii/April 1 (TYO): April 1 nü 1buba NECDC Interstate Senior Men's Friendship Tournament semifinal Nagaland aser Meghalaya na tsüingda asaya tsüingsang majungba ajanga minpronga liasü.

Nagaland Cricket Stadium nung asaya ya 1:15 ako nungi tenzükhia innings ka nung over 35 dang asayatsü lemtet.

Toss akokba sülen Meghalaya-i Nagaland team nem mezüing bat asütsü maongka agütsü. Tzünglu aruba mapang tashi nung Nagaland team-i over 20.4 nung asayar 3 out ser run 58 yanglur liasü. Yugandhar Singh (5), Jonathan Rongsen (9) aser Sedezhalie Rupreo (11) out asüba sülen Hem Bahadur Chetri (22) aser Hokaito Zhimomi (4) na batting mena aliba mapa asaya anenatok.

Iba sülen ground tai asüba ajanga asaya metenzükshitet

aser on-field umpires aser match officials tem masayatsü asoshi telemtetba agia April 2 nü Sovima Cricket Ground nung masü saka Nagaland Cricket Stadium nung 8:45 nungi tenzüka asayatsü lemteta liasü.

Nagaland Cricket Stadium nung tanga semifinal asaya ka nung Manipur-i toss akok aser mezüing field asütsü shim. Mezüing batting amenba sülen Sikkim team nungi Anwesh (8), Arun Chetri (0), Nilesh Lamichanay (6), Pranesh Chetri (0) aser Palzor Tamang (8) nungeri junga masayateti out süatok.

Ajisüaka Ashish Thapa-i süngjemshir asaya pai run 41 yanglu aser pa nem Lee Yong Lepcha (22), Ankur Malik (26) aser Tarun Sharma (17) nungeri teyari agüja parnoki run 144 yanglu.

Sikkim team over 23buba nung wicket 5 out ser run 75

yanglur aliba mapang tzünglu aruba ajanga asaya anentsüsa aküm. Asaya anenba mapang Ashish Thapa aser Lee Yong Lepcha na batting mena liasü.

Manipur nunger bowler tem rongnungi Rajkumar Rex Singh aser Bisworjit Singh nati maneni ball kanga junga ona wicket asemsem agi aser Jotin Pheiroijam aser Bikash Singh natia wicket kaka agia liasü.

Tanabuba innings nung Manipur team-i kanga junga asaya over 28.3 nung run 145 yanglua parnoki asaya ayong ayonga akok. Manipur team atema Karnajit Yumnam-i run 18, Basir Rahman-i run 22, Longjam Ronald-i run 16, Langlonyamba-i run 43, Jotin Pheiroijam-i run 15, Pukhrambam-i run 9 aser Kishan Laishram-i run 15 yanglua parnoki asaya kokogo aser April 3 nü parnok final asayatsü atema jenjang ajangzüktetogo.

Bangladesh team nung Shakib, Liton na anisemogo

Dhaka, Rongchii/April 1 (Agencies): Ireland den Test asaya ka asayatsü aliba atema Bangladesh team nung all-rounder Shakib Al Hasan aser batsman Liton Das na züingoksemogo.

April 4 nungi 8 tashi Dhaka nung asayatsü aliba asaya ya Shakib lenisüba nung asaya aser Liton assistant captain asütsü ta Bangladesh Cricket Board-i ashi.

Shakib aser Liton naprongla IPL nung Kolkata Knight Riders nungi asayar aser tenapronglai Ireland den T20 asayamung Hokolbarnü tembangba sülenbo chioktsü atema mepeshia asüngdangogo, ajisüaka temelaba magütsü.

"Tenaprongla Test asaya nung shilem agitsü ta board-i shiogo. Ibayongji tenaprongla squad nung züingoksemogo," ta chief selector Minhajul Abedin-i AFP dang ashi.

Bangladeshi pacer Mustafizur Rahman bo Delhi Capitals franchise nungi asayatsü atema chiokogo.

Minhajul-i ashiba agi,

batsman Zakir Hasan shibai India den Bangladesh team tatembangbuba Test asayaba mapang kanga junga asaya century ka yangluogo pa yirur aliba ajanga iba asaya nung shilem magitetsü.

Shadman Islam-i Zakir melenogo aser Shoriful Islam-a yirur aliba taneptsü anguba sülen team nung züingoksemogo.

Iba asaya ya Bangladesh aser Ireland na tsüingda mezüingbuba Test asaya asütsü. Iba asayamung nung Ireland pur ODI nung 2-0 agi tamakok angu aser T20 nunga 2-1 agi tamakok ngua liasü.

Ireland pur tang tashi nung Test asem asaya lir aser asaya asemprongla nung tamakok nguogo.

Squad: Shakib Al Hasan (capt), Liton Das, Tamim Iqbal, Shadman Islam, Najmul Hossain, Mominul Haque, Mushfiqur Rahim, Mehidy Hasan Miraz, Taijul Islam, Taskin Ahmed, Khaled Ahmed, Ebadot Hossain, Shoriful Islam, Mahmudul Hasan.

Sorkari tenokdangba agütsüba ajanga Ukraine nunger asayartem akoksatsü: IOC

Rongchii/April 1, 2023 (Agencies): 2024 Paris Olympics nung Russia nunger asayartem toktepra Ukraine nunger asayartem masayadaksütsü asoshi sorkari telemtetba agiba International Olympic Committee-i aitsüogo aser ashiba agi, iba ajanga Ukraine nung siasapong aser asayartem dang akoksatsü.

Russia aser Belarus nunger asayartem tanem tanemi neutrals ama international asayamungtem nung toktepdaksütsü atema IOC-i Mongolbarnü tetuyuba ka agütsüba sülen Ukraine nunger minister Oleh Nemchinov-i iba policy ya Hokolbarnü sangdonga liasü.

Taoba küm February ita nungi Russia-i Ukraine amaka tenzüka sülen iba linük ana nungi asayartem international asayamungtem nung shilem magidaksüi arudar.

"Iba amala telemtetba ka benokra iba ajanga Ukraine nunger asayartem dak kongshitsü aser alimai



anendaksünüba rara dak kecha mekongshitsü, koba IOC-i kukua aitsüogo," ta IOC-i Honibarnü sangdong ka ajanga metetdaksü.

"Asayartem koba international asayamung nung tokteptsü iba indang telemtetba agitsü sorkar dak keta mali ta IOC-i shia aruogo," ta IOC-i ashi.

Ukraine indang cabinet ministers secretary Nemchinov-i ashiba agi, Sports Minister Vadym Huttsait aser national federation tem benokba sülen iba telemtetba agia liasü. Huttsait ya Ukraine Olympic committee tir lir.

Paris Games nung Russia aser Belarus nunger asayartem

shilem agidaksütsü magidaksütsü iba atema IOC-i telemtetba tanga ka agitsü. Iba asayamung nung Russia nungertem asayadaksüra parnok shilem magitsü ta Ukraine-i amokmerenogo.

"Tanga mapang iba asayamung ayongzüka asayaba mapang linük balala tsüingda mangatettep aser rara adoker liasü ajisüaka asayartem toktepra dang asaya aruogo," ta IOC-i ashi.

Cold War mapang ama Olympic boycott asüba nungi jenboa alitsü atema IOC-i Russia aser Belarus nunger asayartem nem tenokdangba agütsütsü nongnanger.

January ita IOC-i linük ana nungi asayartem neutral athletes ama wako aser naklo ken medeni 2024 Games nung shilem agidaksütsü atema Asian qualifying events ajanga maongka agütsütsü lenmang ka mesapoktsü.

Federation-i iba telemtetba agiba ya asayar aser sorkar balalai anema arudar.

1buba Aoleang Badminton asayamung tenzükgogo

Dimapur, Rongchii/April 1 (TYO): Mon Deputy Commissioner Ajit Kumar Verma, IAS-i, 1buba Aoleang Open Badminton Tournament lapokba sentong nung alakteta jaoker ama shilem agiogo.

Iba asayamung ya Mon District Badminton Association Officers' Club Mon-i ayongzüka Badminton Stadium Mon nung April 1 nü tenzükgogo.

Sentong nung o jembiba mapang Mon DC-i, Mon nung mezüingbuba Badminton asayatsü apitetertem nem tenüngsang agütsü aser asayamung tajung ayongzüka atema MDBA aser Officers' Club dang kanga pelaba lemsatepa liasü. Pai ashiba agi, benjung ajak ya lokti rongsenketzüng dak sendaka lir. Benjung ya kari alu aroba sülen aser kari alu wadang metenzükdang küm tembangba aser küm tasen nung Tsüingrem temaotsü meshizüka amunger. Anungji Aoleang benjung ya küm ka tembangba aser küm tasen atema Tsüingrem temaotsü meshizüka amungba benjung ka lir ta pai ashi. Paisa, lanurtem dang jangradema asayatsü aser pei dak aketba sempet tajung sayaba den asayaba mapang tali renlokyonga aotsü ajungshi. Sentong nungsa Er. Tingten

Konyak-i, Badminton asaya ya asaya rongnung tajungtiba ka lir aser arishi küm tasazük kecha mali ta ashi. Iba ajanga tekolok shisatsü arenba aser temang anema toktsüba nung teyari agütsür, ta paisa shisem. Er. Tingten-i, takok aser tamakokji asaya nung shilem ka lir ajisüaka asaya nung shilem agitsübaji kanga tongtibang ta ashi. Pai asayartem dang iba amala asayamung ya pei sempet sayutsü aser yimya tajung agi asaya-a renloka aotsü asoshi maongka tajung ka lir ta ashi.

Sentong nung MDBA tir-i lokti pela agizükba o jembia liasü. Pai, asayamung ayongzüka asayatsü atema shisatsü agütsüba atema DC dang kanga pelaba lemsatep. Pai ashiba agi, Aoleang Monyu ya benjung tulutiba lir ta ashi. Tanübo iba benjung ya nüburtem nem pei sobaliba, libaliro aser inyakyimtem bilemtetshidaksütsü asoshi amunger ajita asünungdang lanurtemi tanü putu nung pei sobaliba maneni angazükettsü ta pai ashi.

Maneni sentong nung Wanmei aser par medemertemi ken tajung ka aten. Alakteta jaoker Ajit Kumar Verma, IAS-i asayamung lapoktsüba sülen OCM aser MDBA na tsüingda Exhibition Match ka asaya liasü.

BILEMDANGANG

"Nükjidong tasen ayutsü atema kecha temeno mali."